



Број: 01,02,03,03/11-05-1-639/24
Сарајево, 16. 5. 2024.

IZVJEŠTAJ

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:			
Organizaciona jedinica	Klasifikaciona oznaka	09-07-2024	Broj priloga
		broj	

**O UČEŠĆU DELEGACIJE PARLAMENTARNE SKUPŠTINE BiH NA
5. MEĐUPARLAMENTARNOJ KONFERENCIJI PLATFORME JERUSALEMA
Istanbul, 26 - 28. april 2024.**

Delegacija Parlamentarne skupštine BiH učestvovala je na 5. međuparlamentarnoj konferenciji Platforme Jerusalema pod nazivom „Sloboda i nezavisnost za Palestinu“, održanoj u Istanbulu, od 26. do 28. aprila 2024. U delegaciji su bili: Kemal Ademović, predsjedavajući Doma naroda PSBiH i predsjedavajući Grupe prijateljstva za Afriku i zemlje Bliskog istoka, Safet Softić, delegat u Domu naroda PSBiH i član Grupe prijateljstva za Afriku i zemlje Bliskog istoka, Sejfudin Hodžić, savjetnik predsjedavajućeg Doma naroda PSBiH, Almira Zukić, sekretarka Grupe prijateljstva za Afriku i zemlje Bliskog istoka i Amila Kličić, prevoditeljica.

Konferencija je održana pod pokroviteljstvom prof. dr. Numana Kurtulmuša, predsjednika Velike narodne skupštine Republike Turske, i Redžepa Tajipa Erdoana, predsjednika Republike Turske, a okupila je oko 700 parlamentaraca iz arapskih, islamskih i međunarodnih parlamenata, uz istaknute vođe palestinskih komisija u parlamentima i istaknute ličnosti Republike Turske. Cilj skupa bio je da se razmotre načini izlaska iz ogromne humanitarne krize i pokaže dodatna podrška Palestini u periodu kada iz dana u dan raste ljudska tragedija u Gazi.

Konferenciju su otvorili predsjednik Lige parlamentaraca za Al-Kuds i predstavnik Lige za Tursku, a zatim su uslijedila obraćanja prof. dr. Numana Kurtulmuša, predsjednika Velike narodne skupštine Republike Turske, i Redžepa Tajipa Erdoana, predsjednika Republike Turske, a potom i obraćanja gostujućih predsjednika parlamenata.

Predsjedavajući Doma naroda PSBiH Kemal Ademović obratio se učesnicima konferencije, istaknuvši da se taj skup održava u izuzetno važnom momentu za čovječanstvo, kada se palestinski narod nalazi pod brutalnom prijetnjom biološkog nestanka.

„Prije nekoliko mjeseci u Sarajevu, na velikoj konferenciji NATO-a, s više od 130 prisutnih zvanica, rekao sam da smo kao civilizacija iznijeli mnoge velike i teške revolucije, ali da smo pali na jednom testu – nismo uspjeli zaštititi civile u ratovima! A sve revolucije i sva naučna i tehnološka dostignuća izgledaju tako sitno i bezvrijedno pred mrtvim tijelom jednog nedužnog djeteta!

Danas moramo podići svoj glas i učiniti sve, baš sve što je u našoj moći da zaštitimo živote nevinih ljudi, staraca, žena i djece Palestine. Današnji skup je skup predstavnika stotina miliona ljudi koje zastupamo i njihov glas se mora čuti!“, rekao je Ademović, te podsjetio na bolna iskustva Bosne i Hercegovine i bošnjačkog naroda kojem pripada. Pozdravio je odluku Međunarodnog suda pravde od 26. januara ove godine da usvoji privremene mjere i naloži Izraelu da hitno i bez odgađanja obustavi sve radnje koje mogu imati za posljedicu bilo koji čin genocida te pozvao sve članice Ujedinjenih naroda (UN) da preduzmu sve mjere u skladu s međunarodnim pravom i zaustave stradanje palestinskog naroda.

Na kraju govora Ademović je naglasio da „sve propuste koje je međunarodna zajednica napravila u Bosni i Hercegovini ne smijemo ponoviti danas u Palestini“.

Predsjedavajući Doma naroda PSBiH Kemal Ademović i zamjenik predsjedavajućeg Predstavničkog doma PSBiH Denis Zvizdić održali su sastanak s predsjednikom Velike narodne skupštine Republike Turske Numanom Kurtulmušom i čestitali na svemu što Republika Turska radi u okviru svoje progresivne vizije „Stoljeće Turske“.

Tokom razgovora sagovornici su upoznali Kurtulmuša s aktuelnom situacijom u zemlji i zahvalili se Republici Turskoj na kosponsoriranju Rezolucije o genocidu u Srebrenici o kojoj će se glasati u maju ove godine na Generalnoj skupštini Ujedinjenih naroda, kada se očekuje da se 11. juli proglasi Međunarodnim danom sjećanja na genocid u Srebrenici koji će se obilježavati svake godine.


Saglasili su se da su mir i stabilnost zemlje od najveće važnosti i da, pored snažne podrške suverenitetu, teritorijalnom integritetu i multietničnosti Bosne i Hercegovine, Turska pruža snažnu podršku BiH i na njenom putu evropskih i integracija u NATO.

Rekli su i da su ukupni bilateralni odnosi dvije zemlje izuzetno dobri i da postoji prostor za unapređenje, posebno u oblasti ekonomije i investicija. Pozvali su Kurtulmuša da s delegacijom Parlamenta Turske posjeti PSBiH.

Drugog dana konferencije održani su parlamentarni forumi, seminari palestinskih komisija, te politički seminar.

Izveštaj pripremila


Almira Zukić



Sekretarka Grupe prijateljstva za Afriku i
zemlje Bliskog istoka

Izveštaj odobrio

Kemal Ademović



Predsjedavajući Doma naroda PSBiH
i predsjedavajući Grupe prijateljstva
za Afriku i zemlje Bliskog istoka

Dostaviti:

- Kolegiju Predstavničkog doma
- Kolegiju Doma naroda
- Kolegiju Sekretarijata PSBiH
- Sektoru za međunarodne odnose i protokol